

आकाशवाणी

खबरां श्रूति खजूरिया कोला,

पैहले खास-खास खबरां:-

1. प्रधानमंत्री नरेन्द्र मोदी होरें शैहरीकरण करी पैदा चुनौतिएं बद्धी आबादी ते भविष्य च पानी दी जरूरतें प्रति शैहरी मुकामी निकाएं गी संवेदनशील बनाने दा आग्रह कीता ऐ।
2. प्रधानमंत्री नरेन्द्र मोदी ते बेल्जियम दे प्रधानमंत्री बार्ट डी वेवर होर अज्ज नमीं दिल्ली च दपक्खी गल्लबात करगंन।
3. भारतीय अंतरिक्ष अनुसंधान संगठन इसरो दे अध्यक्ष वी. नारायणन होरें आखेआ ऐ कि धरती पर तक्क रखने आहले उपग्रह EOS-05 दा प्रक्षेपण कल श्री हरिकोटा च सतीष धवन अंतरिक्ष केन्द्र थमां कीता जाहग।
4. जापान दी प्रमुख क्रेडिट रेटिंग एजेंसी JCR ने भारत दी विदेशी मुद्रा ते मुकामी मुद्रा जारीकर्ता रेटिंग दा दर्जा बदाइए BBB+ थमां A माइनस करी दिता ऐ।
5. बाम्बे हाई कोर्ट नै दिवंगत फिल्म अभिनेता सुशांत सिंह राजपूत दी साबका मैनेजर दिशा सालियान दी मौत दी CBI जांच दा आदेश दिता ऐ।
6. महिला एशिया कप च अज्ज ग्रुप-A दा महत्वपूर्ण मकाबला भारत ते हांगकांग बश्कार खेड्डेया जाहग।

<><><><><><>

ते हून खबरा विस्तार कन्नै:-



PM –ULB s

प्रधानमंत्री नरेन्द्र मोदी होरें शैहरीकरण करी पैदा चुनौतिएं बद्धी आबादी ते भविष्य च पानी दी जरूरतें प्रति शैहरी मुकामी निकाएं गी संवेदनशील बनाने दा आग्रह कीता ऐ। उ'नें शैहरी मुकामी निकाएं आस्तै बी इस चाल्ली दे चिंतन शिवर आयोजित करने दा सुझा दिता। प्रधानमंत्री होरें कल जल शक्ति मंत्रालय आस्सेआ आयोजित 2 दिन दे राष्ट्रीय विभागीय जल सम्मेलन दे समापन सत्र दी अध्यक्षा कीती। उ'नें पानी दे संरक्षण दी तकनीकें गी मता अपनाने पर जोर दिता। मोदी होरें भारतीय विनिर्माणकर्ताएं ते सरबन्धी धड़ें गी असरदार हल विकसित करने ते उ'नें गी बड्डी स्तह पर लागू करने च सक्षम बनाने आस्तै वैश्विक सर्वोत्तम प्रथाएं दी जानकारी देने आहली प्रदर्शनिं ते कारजशालाएं दे आयोजन दा बी सुझा दिता। प्रधानमंत्री होरें सम्मेलन च 2 दिने तगर होई दी व्यापक चर्चा दी सराहना कीती।



PM –Belgian PM

प्रधानमंत्री नरेन्द्र मोदी ते बेल्जियम दे प्रधानमंत्री बार्ट डी वेवर होर अज्ज नमीं दिल्ली च दपकखी गल्लबात करगंन। दवै नेता दपकखी सरबन्धें दे सारे पैहलुएं दे कन्नो-कन्नी आपसी हित दे क्षेत्रीय ते वैश्विक मुद्दें पर चर्चा करडन। बेल्जियम दे प्रधानमंत्री भारत दी त्रै दिन दी यात्रा पर कल रातीं दिल्ली पुज्जे। उन्दे कन्नै रक्षामंत्री थियो फ्रैकन होर बी आए न। पिच्छले बरे फरवरी च ओहदा संभालने मगरा एह उन्दी भारत दी पैहली यात्रा ऐ। भारत-यूरोपीय संघ मुक्त बपार समझौते दे सरबन्धे च ओह कॉन्फेडरेशन ऑफ इंडियन इंडस्ट्री दे इक बपार कार्यक्रम च मुख भाषण देगंन। साहड़े संवाददाता मूजब

एह यात्रा भारत- बेल्जियम सांझेदारी गी होर मज़बूत करने ते बपार ते निवेश- रक्षा ते सुरक्षा ते अश्रय ऊर्जा जनेह आपसी हित दे क्षेत्रें च सहयोग गी अगगे बदाने दा मौका प्रदान करडन।

<><><><><><>

Shivraj -SRLM s

राई-बाई ते ग्रामीण विकास मंत्री शिवराज सिंह होर अज्ज मुम्बई च राज्य निर्माण आजीविका मिशनें ते बैंकें कन्नै इक उच्च स्तरीय बैठक दी अध्यक्षता करडन। बैठक दा मुख मकसद स्वयं-सहायता समूहें गी दिते जाने आहले दोहार दी औसत राशि बदाने आस्तै व्यक्तिगत उद्यम दोहार 2 गुणा करना ऐ। बैठक च जिला केन्द्रीय सहकारी बैंक ते प्राथमिक कृषि दोहार समीति स्तह पर सहकारी दोहार संरचना दी भूमिका गी मज़बूत करिए ते लम्मे चिरे थमां बकाया रौहने दे कन्नै दोहार दी बंड च चिर दी समस्या दा हल तुप्पने दा जत्न कीता जाग।

<><><><><><>

UP-HPV Vaccination

उत्तर प्रदेश च सर्वाइल कैंसर कोला बचाव लेई HPV-टीकाकरण दा इक विशेष अभियान अज्जै थमां शुरु होआ'रदा ऐ। अज्ज 3 सितम्बर कोला लेइयै 17 सितम्बर धोड़ी एह अभियान समूलचे राज्य च चलाया जाहग। एह अभियान इस अवधि दौरान राज्य दे सब्भन 75एं जिले च चलोग जेहदे तैहत 14 बरे कोला घट्ट उम्मी दिएं कोई 10 लक्ख बच्चिएं गी HPV दा टीका लाने दा लक्ष मित्थेआ गेदा ऐ। लखनऊ दे CMO डाक्टर एन.बी. सिंह होरें इस उम्र वर्ग दिएं बच्चिएं ते उन्दे माता-पिता अगगे अपील कीती ऐ

कि ओ अग्गे औन त अपनिएं बच्चिएं गी एह टीका लोआन। एह टीका महिलाएं च होई सकने आहले सर्वाइकल कैंसर दे मामलें गी रोकने च 90 प्रतिशत बचाऽ सुरक्षा दिंदा ऐ। एह टीका 9 कोला लेइयै 14 बरे धोड़ी दी उम्मी च लोआना कारी दा साबत होंदा ऐ ते शरीरै च सुरक्षित ढंगै नै एंटीबॉडी बनाइयै लम्मे समें तगर वायरस कन्नै लड़ने दी ताकत दिंदा ऐ।

<><><><><><>

ISRO-EOS -05

भारतीय अंतरिक्ष अनुसंधान संगठन इसरो दे अध्यक्ष वी. नारायणन होरें आखेआ ऐ कि धरती पर तक्क रखने आहले उपग्रैह EOS-05 दा प्रक्षेपण कल श्री हरिकोटा च सतीष धवन अंतरिक्ष केन्द्र थमां कीता जाहग। नारायणन होरें दस्सेआ जे EOS-05 भलेयां अज्जै -कल्लै दी किस्मा दा अवलोकन उपग्रैह ऐ जेहड़ा मजूदा समें च धरती दी कक्षा च स्थापत कीते जाने आहला भारत दा पैहला इमेजिंग उपग्रैह ऐ। इमेजिंग उपग्रैह माहनू आसेआ त्यार कीता गेदा इक ऐसा उपग्रैह होंदा ऐ जेहड़ा गासै परां होइयै धरती दी सतह जां होरनें ग्रैहें दियां फोटुआं खिच्चने दा कम्म करदा ऐ। इसी EOS यानि अर्थ आब्ज़रवेशन सैटेलाइट बी आखेआ जंदा ऐ। नारायणन होरें दस्सेआ जे एह अभियान भारत दी पृथ्वी पर तक्क रखने दी छमता गी होर मजबूत करोग। कल तिरुमला च श्री वेंकटेश्वर स्वामी मंदरै च पूजा -अर्चना करने दे बाद मीडिया कन्नै गल्लबात करदे होई उ'नें एह जानकारी दिती। पूजा शा पहले उ'नें GSLV-F-17 राकेट दे मॉडल गी भगवान वेंकटेश्वर हुंदे चरणे च अर्पत कीता।

<><><><><><>

JCR India Credit Rating

जापान दी प्रमुख क्रेडिट रेटिंग एजेंसी JCR ने भारत दी विदेशी मुद्रा ते मुकामी मुद्रा जारीकर्ता रेटिंग दा दर्जा बदाइए BBB+ थमां A माइनस करी दिता ऐ। एह रेटिंग कुसै मुख्य दी सरकार दी दौहार चकाने दी क्षमता ते माली साख बारे आज़ाद मूल्यांकन करदी ऐ। खजाना मंत्रालय नै आखेआ ऐ जे एह भारत दी मज़बूत आर्थिक वृद्धि-मज़बूत विकास आधार बनाने च आर्थिक नीतिएं गी असरदार ते माली प्रणाली दी बेहतरी गी दर्शादा ऐ। मंत्रालय नै आखेआ ऐ जे एह चुनौतीपूर्ण वैश्विक माहौल च होआ ऐ ते लगातार विकास- असरदार आर्थिक नीतिएं- बेहतर राजकोषीय प्रबंधन ते मज़बूत माली प्रणाली आस्सेआ समर्थित भारत दे आर्थिक बुनियादी ढांचे गी दर्शादा ऐ।



Bombay HC -Disha Salian

बाम्बे हाई कोर्ट नै दिवंगत फिल्म अभिनेता सुशांत सिंह राजपूत दी साबका मैनेजर दिशा सालियान दी मौत दी CBI जांच दा आदेश दिता ऐ ते 6 बरे तगर FIR दर्ज नैई करने आस्तै मुम्बई पुलिस गी फटकार लाई। न्यायमूर्ति सारंग कोतवाल ते रंजीत सिंह राजा भोंसले हुंदी खंडपीठ नै आखेआ जे जांच बड्डे लम्मे चिरे तगर नैई चली सकदी। अदालतै आखेआ ऐ जे मामले दी सेई ते ठोस जांच यकीनी करने आस्तै केन्द्रीय एजेंसी थमां जांच जरूरी ऐ। अभिनेता सुशांत सिंह राजपूत हुंदी किश चिर लेई मैनेजर रेई दी दिशा सालियन दी मौत 8 जून 2020 गी मुम्बई दे मलाड इलाके च इक रिहायशी इमारत दी 12मीं मंजिल थमां हेठ पौने करी होई। इक हफ्ते मगरा 14 जून गी सुशांत सिंह राजपूत बी अपने अपार्टमेंट च मृत पाए गे हे- जिस करी एह क्यास लाए जा'रदे हे जे दौनें मौते बश्कार कोई सरबंध होई सकदा ऐ।



Nepal –Flash Flood

नेपाल ते तिब्बत च चान्नचक्क आए दे हाड़ च मरने आहलें दी गिनतरी बलिए 1250 होई गेई ऐ। बचावकर्मी बरखा ते मलबे च बचे दे लोकें दा पता लाने च जुटे दे न। भोटे-कोशी नदी दे रस्ते च बनी दी सुरंगे ते नेपाल दे भूमिगत बिजलीघरें च लोकें दे फसैं होने दी शेंका ऐ। प्रधानमंत्री बालेंद्र शाह होरें आखेआ ऐ जे जलवायू बदलाव कन्नै जूड़ी दी इस आपदा गी अंतराष्ट्रीय समुदाय दे सामने मजबूती कन्नै पुट्टने दी लोड़ ऐ। पिच्छले हफ्ते चान्नचक्क आए दे हाड़ च परोआर आस्सेआ लापता लोकें दे प्रतीकात्मक खीरी संस्कार बश्कार उन्दा एह ब्यान आया ऐ। इस आपदा च 583 विदेशी नागरिक लापता न। नेपाली सेना ते सुरक्षाबलें हेलीकाप्टरें ते जमीनी रस्ते राए अजें तगर 11 जहार 993 लोकें गी बचाया ऐ। खोज ते बचाव अभियान च लगभग 21 जहार 314 सुरक्षाकर्मी तैनात न। नेपाल सीमा कश तिब्बत च आए दे हाड़ च चीनी भू-भाग च मरने आहलें दी गिनतरी 21 होई गेई ऐ ते 514 लोक लापता न।



Women Cricket

महिला एशिया कप च अज्ज ग्रुप-A दा महत्वपूर्ण मकाबला भारत ते हांगकांग बश्कार खेड्ढेया जाहग। भारती समें दे मताबक मैच संजा साइडे 7 बचे शुरु होग। दुबई दे इंटरनैशनल क्रिकेट स्टेडियम च खेड्ढे जाने आहले इस मैच च भारतीय टीम जेहड़ी रिकार्ड 7 बारी इस टूर्नामेंट दी चैंपियन बनी चुकी दी ऐ जित्त दी अपनी लैह गी मजबूत करने दी पूरी कोशश करोग। तोंआई ग्रुप-बी च कल श्रीलंका ते इंडोनेशिया

बशकार मकाबला होआ जेहदे च श्रीलंका ने 75 रन्ज कन्नै जित दर्ज कराई। पैहले बल्लेबाजी करदे होई श्रीलंका ने 20एं ओवरें च 7 विकटें दे नुक्सान पर 124 रन्ज बनाए जेहदे परते च इंडोनेशिया दी पूरी टीम 18 ओवर ते 3 गेदां खेड्डियै छड़े 49 रन्ज गै बनाई सकी।

<><><><><><>